


岱史



漢書門類			
二	三	五	九
一	三	一	九
冊	架	函	號

內閣文庫			
九	三	五	漢
三	一	五	書
一	三	九	類
八	冊	號	架

內閣文庫		
番號	漢	2359
冊數	13	(3)
函號	292	114

六

三




岱史第六卷狩典紀

附封禪

淺草文章

叙曰曷紀乎狩典也紀帝王時巡之大典也而并及
 夫封禪者何紀其變也亦紀夫當時君之侈臣之諛
 以示儆也夫五載一狩昉於虞書十二年一巡見諸
 周制時維仲春則生長之月岳維泰岱則生長之方
 于時坐明堂朝群后考覈其政令凡以爲民也豈似
 後世人主琢石銘山以夸大其業泥金檢玉以徼福
 於神盤樂戕民千乘萬騎而隈云七十二君之故事
 秦漢以來即所稱英君亦不免焉卓哉我



成祖文皇帝灼見而却絕之以垂憲

昭代豈非超越千古者哉余茲附錄前代封禪文一
二而終之以先賢正論俾觀者得以考鑒焉

唐虞

歲二月東巡守至于岱宗柴望秩于山川肆覲

東后協時月正日同律度量衡修五禮如五器

五載一巡守群后四朝

見舜典

夏后氏因之

周

十二年一巡狩歲二月東巡狩至于岱宗覲諸侯

于明堂

見周禮○明堂說見遺蹟紀

秦

始皇二十八年東行郡縣上鄒嶧山立石與魯諸

儒生議刻石頌秦德議封禪望祭山川之事乃遂

上泰山立石封祠祀下風雨暴至休於樹下因封

其樹為五大夫禪梁甫刻所立石

見史記○王仲淹謂封禪非古

啓於秦漢故志封禪以秦為首

李斯篆刻石文

今存二十九字詳見遺蹟紀

事天以禮立身以義事父以孝成人以仁四海之

內莫不郡縣四夷八蠻咸來貢職人庶蕃息天祿

永得今皇帝臨位作制明法臣下修飭二十有六

年 初并天下罔不賓服親巡遠方黎民登茲泰山
周覽東極從臣思迹本原事業祇誦功德治道運
行諸產得宣皆有法式大義休明垂於後世順承
勿草皇帝躬聖既平天下不懈於治夙興夜寐逮
設長利專隆教誨訓經宣達遠近畢理咸承聖志
貴賤分明男女禮順慎遵職事昭格內外靡不清
淨施於後嗣化及無窮遵奉遺詔永承重戒

漢

武帝元封元年東巡海上夏四月登封泰山降坐

明堂詔曰朕曰眇身承至尊兢兢焉惟德菲薄不

明于禮樂故用事八禮遭天地况施著見景象屑
然如有聞震于怪物欲止不敢遂登封泰山至于
梁父然後升壇肅然自新嘉與士大夫更始其曰
十月爲元封元年行所巡至博奉高蛇丘歷城梁
父民田租逋賦貸已除加年七十以上孤寡帛人
二匹四縣無出今年筭賜天下民爵一級女子百
戶牛酒又下詔曰古者天子五載一巡狩用事太
山諸侯有朝宿地其令諸侯各治邸太山下
二年秋作明堂于泰山

太初元年冬十月行幸泰山

太始四年春三月行幸泰山壬午祀高祖于明堂
臣配上帝因受計癸未祀孝景皇帝于明堂甲申
修封丙戌禪石閣

征和四年春三月上耕于鉅定還幸泰山

司馬遷封禪書畧

自古受命帝王曷嘗不封禪盖有無其應而用事
者矣未有睹符瑞見而不臻乎泰山者也齊桓公
既霸會諸侯於葵丘而欲封禪管仲曰古者封泰

山禪梁父者七十一家而夷吾所記者十有二焉

昔無懷氏封泰山禪云云伏羲封泰山禪云云神

農封泰山禪云云炎帝封泰山禪云云黃帝封泰

山禪亭亭顛顛封泰山禪云云帝嚳封泰山禪云

云堯封泰山禪云云舜封泰山禪云云禹封泰山

禪會稽湯封泰山禪云云周成王封泰山禪社首

皆受命然後得封禪桓公曰寡人北伐山戎過孤

竹西伐大夏涉流沙東馬懸車上卑耳之山南伐

至召陵登熊耳山以望江漢兵車之會三而乘車

之會六九合諸侯一匡天下諸侯莫違我昔三代受命亦何以異乎於是管仲睹桓公不可窮以辭因設之以事曰古之封禪鄒上之黍北里之禾所以爲盛江淮之間一茅三脊所以爲藉也東海飲比目之魚西海致比翼之鳥然後物有不召而自至十有五馬今鳳凰麒麟不來嘉穀不生而蓬蒿藜莠茂鳴鳧數至而欲封禪毋乃不可乎於是桓公乃止其後百有餘年而孔子論述六藝傳畧言易姓而王封泰山禪乎梁父者七十餘王矣其俎

豆之禮不童蓋難言之秦始皇即帝位三年東巡郡縣祠鄒嶧山頌秦功業於是徵從齊魯之儒生博士七十人至於泰山下諸儒生或議曰古者封禪爲蒲車惡傷山之土石草木掃地而采席用菹稽言其易遵也始皇聞此議各乖異難施用由此絀儒生而遂除車道上自泰山陽至嶺之石頌秦始皇帝德明其得封也從陰道下禪於梁父其禮頗采太祝之祀雍上帝所用而封藏皆秘之世不得而記也始皇之上泰山中阪遇暴風雨休於大

樹下諸儒生既不得與用於封事之禮聞始皇遇風雨則譏之始皇封禪之後十二歲秦亡諸儒生疾秦焚詩書誅僂文學百姓怨其法天下叛之皆偽曰始皇上泰山為暴風雨所擊不得封禪此豈所謂無其德而用事者邪今上自得寶鼎與公卿諸侯議封禪封禪用希曠絕莫知其儀禮而群儒采封禪尚書周官玉制之望祀射牛事齊人丁公年九十餘曰封禪者古不死之名也上於是乃令諸儒習射牛草封禪儀數年至且行天子既聞公

孫卿及方士之言黃帝以上封禪皆致恠物與神通欲放黃帝以上接神仙蓬萊高世比德於九皇而頗采儒術以文之群儒既不能辯明封禪事又牽拘於詩書古文而不能騁上為封禪祠器示群儒盡罷諸儒不用三月東上泰山泰山之草木葉未生乃令人上石立之泰山巔上念諸儒及方士言封禪人人殊不經難施天子至梁父禮祠地主乙卯令侍中儒者皮弁薦紳射牛行事封泰山下東方如郊祀太乙之禮封廣丈二尺高九尺其下

則有玉牒書書秘禮畢天子獨與侍中奉車子侯
上泰山亦有封其事皆禁明日下陰道丙辰禪泰
山下趾東北肅然祭后土封禪祠其夜若有光晝
有白雲起封中天子從禪還坐明堂群臣更上壽
明年夏旱公孫卿曰黃帝時封則天旱乾封三年
上乃下詔曰天旱意乾封乎修五年之禮如前而
加以禪祠石閭石閭者在泰山趾南方方士多言
此仙閭也故上親禪焉太史公曰余從巡祭天地
諸神名山川而封禪焉入壽宮侍祠神語究觀方
士祠宮之意於是退而論次自古以來用事於鬼
神者具見其表裏後有君子得以覽焉若俎豆珪
幣之詳獻酬之禮則有司存

班固白虎通畧

王者易姓受命而起必升封泰山何教告之義也
始受命之時改制應天天下太平功成封禪以告
太平也所以必於泰山何萬物所交代之處必於
其上何因高告高順其類也故升封者增高也下
禪梁甫之山其廣厚也刻石紀號者著己之功績

以自效也天以高爲尊地以厚爲德故增泰山之高以報天附梁甫之陞以報地明天地之所命功成事遂有益於天地若高者加高厚者加厚矣或曰封者金泥銀繩或曰石泥金繩封以印璽故孔子曰升泰山觀易姓之王可得而數者七十有餘封者廣也言禪者明以成功相傳也於梁甫何以三皇禪繹繹之山明已成功而告有德者居之繹繹者無窮之意也五帝禪于亭亭者量度審認德著明也三王禪于梁甫之山著梁信也甫輔也輔天地之道而行之也太平乃封告于天必也於岱宗何明告易姓刻石紀號告自紀于百王也燎祭天報之義也詩云於皇時周陟其高山言周太平封泰山也

光武皇帝建武二十年十月東巡狩至於岱宗三十年群臣上書請封禪詔曰即位三十年百姓怨氣滿腹吾誰欺欺天乎曾謂泰山不如林放何事汗七十二代之編錄桓公欲封禪管仲非之若郡縣遠遣吏上壽盛稱虛美必髡令屯田從此

群臣不敢復言 三十二年帝夜讀河圖會昌符
 曰赤劉之九會命岱宗感此文乃詔梁松按索圖
 識文言九世封事梁等列奏乃許焉永元封故事
 議封禪所施用有司奏當用方石累壇玉牒玉檢
 金泥及石檢度數帝以用石功難又欲及二月封
 禪故詔梁松因故封石空更加封而已松疏予不
 可二月至奉高遣侍御史與蘭臺令將工先上山
 刻石辛卯封泰山甲午禪于梁父四月己卯肆赦
 以建武三十二年為建武中元元年

光武刻石文畧

維建武三十有二年二月皇帝東巡狩至于岱宗
 柴望秩于山川徧于群神遂覲東后從臣太尉憲
 行司徒事特進高密侯禹等漢賓二王之後在位
 孔子之後褒成侯序在東后蕃王十二咸來助祭
 河圖赤岱符曰劉秀發兵捕不道四夷雲集龍圖
 野四七之際火為主河圖會昌符曰赤帝九世巡
 省得中帝劉之九會命岱宗誠善用之姦偽不萌
 赤漢德興九世會曰巡岱皆當天地扶九崇經之

常漢大興之道在九世之王封于泰山刻石著紀
禪于梁父退省考五河圖合古篇雒書甄曜慶壽
經鉤命經識所傳昔在帝堯聰明密微讓與舜庶
後裔握璣王莽以舅后之家三司鼎足冢宰之權
勢依託周公霍光輔幼歸政之義遂以篡叛僭號
自立宗廟隳壞社稷喪亡不得血食十有八年揚
徐青三州首亂兵革橫行延及荊州豪傑并兼百
里北聚往往僭號北夷作寇千里無煙無鷄鳴犬
吠之聲皇天眷顧皇帝以匹庶受命中興年二十
八載興兵起是以帝次誅討十有餘年罪人斯得
黎庶得居爾田安爾宅書同文車同軌人同倫舟
輿所通人迹所至靡不貢職建明堂立辟雍起靈
臺設庠序同律度量衡修五禮五玉三帛二牲一
死贊吏各修職復于舊典在位三十有三年六十
有一乾乾日昃不敢荒寧涉危歷險親巡黎元恭
肅神祇惠恤耆老理庶遵古聰允明恕皇帝唯慎
河圖雒書正文是月辛卯柴登泰山甲午禪于梁
陰以承靈瑞以為兆民永茲一字垂于後昆百僚

從臣郡守師尹咸蒙祉祐永永無極

章帝元和二年正月東巡狩柴告岱宗幸奉高祀
五帝于汶上明堂

安帝延光三年二月丙子東巡狩辛卯柴告岱宗

魏明帝東巡狩凡三至岱宗所過存問高年恤疾苦
或賜穀帛

晉文帝開皇九年朝野皆請封禪詔畧曰以薄德而
封名山用虛言而干上帝非朕攸聞今後言封禪
宜即禁絕十四年百官抗表固請封禪帝令牛弘

等創儀注既成帝視之曰茲事體大朕何德以堪
之但當東巡因祭泰山耳

唐太宗貞觀初羣臣並請封禪唯魏徵以為不可
六年文武官以初平突厥盛德被於海內又年穀
屢登表封泰山太宗謂侍臣曰朕每見衆議以封
禪為盛事頗奏勸朕行之如朕本心但使天下太
平家給人足雖闕封禪之禮亦可比德於堯舜若
百姓不足夷狄內侵縱修封禪之儀亦何異桀紂
昔秦始皇為暴虐之主漢文為有德之君以此而

言無假封禪且禮云掃地而祭以表至誠何必遠
登高山封三尺土也太宗雖納微言而藩臣猶抗
表勸請十五年東幸至洛陽而彗星見乃止
高宗麟德二年幸東嶽乾封元年正月封泰山禪
于社首以皇后武氏為亞獻越國太妃燕氏為終
獻其帷帟錦繡群臣瞻望多竊笑之

玉牒祝文

有唐嗣天子臣某敢昭告于昊天上帝有隋運屬
顛危數窮否塞生靈塗炭鼎祚淪亡高祖伏黃鉞
而救黎元賜玄圭而拯沉溺太宗功宏鍊石定區
宇於再麾業壯斷鼉飲滄海而一息臣忝奉餘緒
恭承積慶遂得崑山寢燎炎海澄波雖乃業茂宗
祧斯實降靈穹昊今謹告成東岳歸功上玄大寶
克隆鴻基永固疑薰萬姓陶化八紘

駱賓王為齊州父老請陪封禪文

圓天列象紫宮通北極之尊大帝凝圖玄猷暢東
巡之禮是知道隆光澤既輯玉于雲臺業紹禋宗
必塗金于日觀伏惟皇上乘乾握紀纂三統之重

光御極登樞應千靈之累聖故得河浮五老啓赤
文于帝期海薦四神奉冊書于王會瑞開三脊祥
洽五雲既而緝總章之舊文紹辟雍之故事非煙
翼戟移玉輦于梁陰若月承輪秘金繩于岱嶽臣
等質均芻狗陰謝桑榆幸屬堯鏡多輝昭餘光于
連石軒圖廣運追盛禮于撻金然而鄒魯舊邦臨
淄遺俗俱沐二周之化咸稱一變之封境接青疇
俯瞰獲麟之野山開翠屺斜連辨馬之岑豈可使
稷下遺氓頓隔陪封之禮淹中故老獨奏黃成之

誠是用說日披丹仰壁輪而三舍望雲紆素對天
閣于九重倘允微誠許陪大禮則夢瓊餘息翫仙
閣以相驩就木殘魂遊岱宗而載躍

玄宗開元十二年群臣多言封禪中書令張說又
固請乃下制以十三年有事於泰山御製御書紀

泰山銘

玉牒祝文

有唐嗣天子臣某敢昭告于昊天上帝天啓李氏
運興土德高宗太宗受命立極高宗升中六合殷

盛中宗紹復繼體不定上帝眷祐錫臣忠武底綏
內艱推戴聖父恭承大寶十有三年敬若天意四
海晏然封祀岱岳謝成于天子孫百祿蒼生受福

玄宗紀泰山序

銘勒石嶽嶺磨崖碑詳見遺蹟

朕宅帝位十有四載顧惟不德懼於至道任夫難
任安夫難安茲朕未知獲戾於上下心之浩蕩若
涉於大川賴上帝垂休先后儲慶宰衡庶尹交修
皇極四海會同五典敷揚歲云再熟人用大和百
辟僉謀倡予封禪謂孝莫大於嚴父謂禮莫尊於

告天天符既至人望其積固請不已固辭不獲予
與夫二三臣稽虞典繹漢制張皇六師震疊九寓
旌旅有烈士馬無譁肅肅邕邕翼翼溶溶以至于
岱宗頂也爾雅云泰山為東嶽周官曰兗州之鎮
山實惟天帝之孫群靈之府其方處萬物之始故
稱岱焉其位居五岳之伯故稱宗焉曰昔者受命
易姓於是乎啓天地薦成功序圖錄紀氏號朕承
先王茲率厥典實欲報玄天之眷命為蒼生之祈
福豈敢高視萬古自比九皇哉故設壇場於山下

受群方之助祭躬卦燎於山上異一獻之通神斯
亦因高崇天就廣增地之義也乃仲冬庚寅有事
東嶽類于昊天上帝配我高祖在天之神罔不畢
降粵翌日禪於社首侑我聖考祀於皇祇在地之
神罔不咸舉暨壬辰觀群后上公進曰天子膺天
符納介福群臣拜手稽首稱千萬歲慶恭歡同陳
誠以德大運叶度彝倫攸叙三事百揆時乃之功
萬物由庚入允殖列牧衆宰時乃之功一二兄
弟篤以老必錫類萬國時惟休哉我儒制禮我史

作樂天地擾順時惟休哉蠻夷戎狄重譯來貢

聖之化朕何慕焉五靈百寶日來月集會昌之運
朕何感焉凡今而後倣乃在位一王度齊衆法推
舊章補缺政存簡易去煩苛思立人極乃見天則
於戲天生蒸人惟后時又能以美利利天下事天
明矣坤厚載物惟后時相能以厚生生萬人事地
察矣天地明察鬼神著矣惟我藝祖文考精爽在
天其曰懿予幼孫克享上帝時若馨香其丕乃曰
會我之文武曾孫其誕錫新命續我舊業永保天

祿子孫其承之予小子敢對揚上帝之休命則亦
 與百執事尚綏兆人將多于前功而必彼後患一
 夫不獲萬方其罪予一心有終上天其知我朕惟
 寶行三德曰慈儉謙慈者履無疆之言儉者崇將
 來之訓自滿者人損自謙者天益苟如是則軌迹
 易循基構易守磨石壁刻金記後之人聽詞而見
 心觀末而知本銘曰惟天生人立君以理惟君受
 命奉為天子代去不留人來無已德涼者滅道高
 斯起赫赫高祖明明太宗爰革隋政奄有萬邦盛
 天張宇盡地開封武稱有截文表時邕高宗稽古
 德施周溥茫茫九夷削平一鼓禮備封禪功齊舜
 禹巖巖岱宗衍我女神中宗紹運舊邦維新睿宗
 繼明天下歸仁恭已南面網緼化醇告成之禮留
 諸後人緬予小子重基五聖匪功伐高匪德矜盛
 欽若祀典丕承永命至誠動天福我萬姓古封泰
 山七十二君或禪社首或禪云云其迹不見其名
 可聞祇通文祖光昭舊勳方士虛誕儒書齷齪伏
 后求仙誣神檢玉秦災風雨漢汗編錄德未合天

或承之辱道在觀政名非從欲銘心絕巖播告群
岳

宋太宗皇帝太平興國八年泰山父老千餘人詣闕
請東封上譙讓不允中外群臣獻歌頌稱功德請
封禪者不可勝計 雍熙元年群臣三上表陳請
詔以今年十一月有事于泰山尋以乾元文明二
殿災詔罷封禪

真宗大中祥符元年兗州父老呂良等千二百七
十八人詣闕請封禪上曰此大事不可輕議知州
邵曄又率屬官及兗州進士孔謂等伏闕陳請宰
相王旦率文武百官諸軍將校州縣官吏蕃夷僧
道耆壽二萬四千七十人詣東上閤門請封泰山
詔不允又四表懇請乃詔以今年十月有事於泰
山先是殿中侍御史趙湘請封禪上拱揖不荅王
旦等曰封禪之禮曠廢已久若非聖世承平豈能
振舉初王欽若既以城下之盟毀寇準上自是常
快快他日問欽若曰今將柰何欽若度上厭兵即
謬曰陛下以兵取幽薊乃可刷此耻也上令思其

次欽若因請封禪以鎮服四海誇示夷狄上曰王
 旦得無不可欽若以上意諭旦旦黽勉而從十月
 辛卯發京師丁未次奉高唐戍步輦登山辛亥祀
 昊天上帝于闕臺中書侍郎讀玉牒文即日還奉
 高宮日輪五色雲見先朝以來四方所獻珍禽奇
 獸悉縱於山下癸丑御朝觀壇大赦天下改乾封
 縣曰奉符改泰山頂曰太平頂

玉牒祝文

有宋嗣天子臣諱啟昭告于昊天上帝運啓大同

惟宋受命太祖開階功成治定太宗膺圖重熙累
 盛粵惟冲人不承列聖一紀于茲四隩來暨玄祝
 殊尤六府章示時和年豐群生咸遂僉議大封聿
 申昭事躬陟喬岳對越上玄祈福逮下侑神奉先
 天祿無疆靈休允迪萬乘其昌永保純錫

真宗御製序銘

勒碑泰陰亭詳見遺蹟紀

朕聞一區宇而恢德教安品物而致昇平此邦家
 之大業也考茂典而薦至誠登喬嶽而答純錫此
 王考之昭事也結繩已往茫茫而莫知方冊所存

章章而可辨罔不開先流福累洽儲休長發其祥
永錫爾類故能禋祀上帝肆覲群后追八九之遐
躅狗億兆之歡心是以武王勦獨夫集大統而成
王以之東巡高帝平三猾啓天祿而武帝以之上
封彙以五代陵夷四方分裂嗷嗷九域顧影而求
存顛顛萬民籲天而仰訴不有神武多難何以載
不有文明至治何以復恭惟太祖啓運立極英武
聖文神德玄功大孝皇帝積善自始受命無疆歷
試于艱難終陟于元后威靈震疊玄澤汪洋無往
不賓有來斯應濟民於塗炭登物於春臺俾乂萬
邦成湯之甚盛咸宣九德文王之有聲啓運于前
垂裕於後太宗至仁應道神功聖德文武大明廣
孝皇帝洪基載紹景貺誕膺如日之升燭于率土
如天之廣覆于群生人文化成神道設教尊賢尚
德下武後刑金石之音明靈是格玉帛之禮蠻貊
來同書軌畢臻典儀無闕上玄降鑒虞舜之溫恭
庶民不知唐堯之於變重熙之盛冠絕千古先增
高之文已頒乎成命逡巡其事謙莫大焉肆予冲

人獲守丕構其德不類其志不明弗克嗣興罔識
攸濟屬以陽春屆節靈文錫慶由是濟河耆老鄒
魯諸生啓予以神休邀予以封祀不遠千里來至
闕庭朕惕然而莫當彼確乎而莫止俄而王公藩
牧卿士列校敵封者五上伏閤者萬餘以為景命
維新珍符紛委不可辭者天意不可拒者群心天
意苟違何以謂之順道群心苟鬱何以謂之從人
是宜登介立成大禮敦諭雖至勤請彌固切念乾
坤垂祐宗祏儲祉導揚嘉氣僅洽小康俾夫疆場
以寧干戈以息風雨以順稼穡以登無震無驚既
庶既富皆天之賜也豈朕之功歟雖則告成功紀
徽號非涼德之克堪也然而序圖錄咎殊禎非恥
躬之敢讓也天孫日觀梁甫仙問五嶽之宗萬物
之始升中燔燎舊章斯在繼繩先志懿範遵已定
之規祇事園壇嚴配肅因心之孝於是詔輔臣以
經置命群儒而講習給祠祀者罔有不至供朕身
者無必求豐故玉幣犧牲朕之所勤也羽儀服御
朕之所簡也精意篤志夙興夕惕誠明洞達顯應

還彰自天垂恩正真親臨於雲馭奉符行事子育
 敢怠於政經粵以暮秋之初恭享清廟告以陟配
 孟冬之吉虔登岱宗伸乎對越奉寶籙於座右升
 祖宗以並侑禮之正也孝之始也乃禪社首厥制
 咸若于時天神畢降地祇畢登彤嚮可期奠獻如
 覩其薦也雖慙乎明德其感也實在乎至誠亦復
 酌艷宮之前聞遵甘泉之受計百辟委珮五等奉
 璋肆青施仁舉善勸治稽考制度採撫風謠文物
 聲明所以揚二聖之洪烈歡娛慶賜所以慰百世
 之來思盖又兩儀之純嘏七廟之餘慶邦家之盛
 美蒸黎之介福豈予寡昧所可致焉唯當寤寐寤
 威夙夜惕厲不自滿假不自逸豫寵綏庶國茂育
 群倫以荅穹昊之眷命馬勒銘山阿用垂永世銘
 曰節彼岱嶽巋然東方庶物伊始玄感其章自昔
 受命及始穹蒼燔柴於此七十六王顧惟寡薄恭
 嗣洪猷乾乾慄慄雖休勿休元符昭錫餘慶遐流
 群情所迫盛則爰修前王丕顯是月告成伊予冲
 眇無德而名永懷眷佑祇荅景靈聿崇嚴祀用達

精誠殊祥疊委寓縣奔馳禮無違者神實格思藏封石累刻字山嶺蒸民永泰繁祉常垂

孫奭諫疏

陛下才畢東封又議西幸非先王卜征五年重謹之意今國家土木之功累年不息水旱作沴饑饉居多乃欲勞民事神其享之乎又曰今之奸臣以先帝嘗封禪故贊陛下以繼承先志先帝欲北平幽朔西取繼遷則未嘗獻一謀畫一策乃卑辭厚幣求和於契丹威國廢爵姑息於保吉謂主辱臣死為空言以誣下罔上為已任是陛下以祖宗艱難之業為奸臣僥倖之資此臣所以長嘆痛惜也

徽宗政和四年兗鄆濮開德興仁潁昌府鄭州廣濟永興軍等上言父老欲詣闕請皇帝登封詔却之時蔡京當國將講封禪以文太平預具金繩玉檢及凡儀物甚備造舟四千艘雖兩具亦以十萬計他皆稱是然不果行



永樂間太常官獻頌請封泰山

成祖文皇帝却絕之

王直題卻封禪頌藁右卻封

禪頌藁前翰林學士贈禮部尚書文穆公

謚

胡廣作

也昔

太宗文皇帝在位時太常臣有言曰古者聖人治天

下功德成隆則必興封禪之禮以告于神明垂美

於萬世今陛下繼統天清地寧民物咸遂 聖德

神功古無與讓而乃封禪未講何以繼前代帝王

之盛請命禮部行之上曰封禪非古也帝王之有

聞於後者在德不在封禪不許公聞之曰此盛德

事也而大臣有與之比者陰助之公慮為所惑乃

本封禪非古之說與後世賢君良臣所以闕而不

行之美作此詩以獻

皇上聖性高明真知灼見足以破千古之謬為百王

之明監覽之喜曰是朕心也於是言者沮而封禪

卒不行君子之尊君務引其君以當道若公是也

彼秦皇漢武肆其侈心以瀆擾上下天地厭之顧

乃以是為說此為邦者所以遠佞人而公之所深

慮也

歷代儒臣封禪論

漢司馬虎曰自上皇以來封泰山者至周七十二代易姓則改封者著一代之始明不相襲也繼世之王巡狩則有修封以祭而已自秦始皇孝武帝封泰山本因好仙信方士之言及造石檢即封之事也天道質誠約而不費故牲用犢器用陶匏殆將無事於檢封之間而樂難攻之石也夏少康周宣王由廢復與不聞改封光武欲因孝武故封而梁松固爭以為必改乃當天意既封之後未有能福而松卒被誅死雖罪由身作蓋亦誣神之外咎也且帝王所以能大著于後者實在其德加於人不聞其在封矣崔靈恩曰自周以前封者皆封土為壇至秦皇漢武始用石檢袁宏曰夫揖讓受終必有至德於天下征伐受命必有大功於萬物是故王者初基則有封禪之事蓋以其成功告于神明者也夫東方者萬物之所始山嶽者靈氣之所宅故求之物本必於其始取其所通必於所宅崇其壇場則謂之封明其代興則謂之禪然則封禪者

王者開務之大禮也德不周洽不得輒議斯事功不弘濟不得鬻鬻斯禮曠代一有其道至高自黃帝堯舜至于三代各一得封禪未有中修其禮者也雖繼體之君時有功德此蓋率復舊業增修其前政不得仰齊造國同符改物者也夫神道真一其用不煩天地易簡其禮尚質故籍用白茅貴其誠素器用陶匏取其易從然則封禪之禮簡易可也若夫石函玉牒非天地之性也

梁許懋曰舜柴岱宗是為巡狩而鄭玄引孝經鉤

命決云封于泰山考績燔燎禪于梁甫刻石紀號

此緯書之曲說七十二君燧人之前世質民淳安得泥金檢玉結繩而治安得鐫文告成妄亦甚矣若聖主不須封禪若凡主不應封禪秦始皇嘗封泰山孫皓嘗封國山皆由主好名於上而臣阿肯於下非盛德之事不可為法也

宋胡致堂曰緯書本原於五經而失之者也而充於素於鬼神之理幽明之故夫鬼神幽明之故非知道者不能識斷國論者誠能一決以聖人之經經

所以載道雖有緯書識記屏而不用則庶乎其不
謬於理矣登封之事原於柴燔而失之者也詩書
紀巡狩而柴者記所謂祭天也至岱宗陟其高山
云者記所謂因名山也有山則因以為高無則于
郊而垓其義類一也又有大事而告于上帝者云
王克商始有天下故柴望而告也舍此則瀆矣記
以饗帝于郊與升中于天為二事則傳者之失也
然則七十二君之編錄詩書禮典畧不經見審者
是事乃天下國家之盛舉堯舜禹湯文武成康昭
宣皆身致太平安得闕而弗講故前世論登封者
莫善於許懋惜乎世祖之臣智不及此陷其君於
過舉而不得聞也封禪之事漢唐之君徃徃行
之曾無一人建議明白如許懋者賢哉懋乎其學
可謂正矣漢唐以來緯書行而經學弛重以鄭玄
博聞寡要不知折衷於聖人而惟緯書之信世無
稽古之言以祛群惑遂使有天下者於無事時肆
其侈心千乘萬騎巡狩侈費登山琢石夸大功德
或有秘祝以祈不死取笑當代貽譏後來彼梁武

之資未必如漢光武之英也一聞懋言遂遏欲行
之意推廣其義以答請者則賢於光武遠矣使其
舉措每如此則金甌之業何缺壞之有

章俊卿曰以封禪為非古者王仲淹也以封禪為
不經者李泰伯也以封禪為不足信者蘇子由也
夫六經無封禪之文帝王無封禪之事著是文者
管仲疏其源史遷浚其流季仲推其波張說助其
瀾侈是事者祖龍噓其煙孝元封其燼隋帝熾其
膏玄宗烈其焰是封禪之典惟以肆情示誇也證

之以六經之明文質之以帝王之實迹則後世之
惑滋甚且云云一山也或以為在東山或以為在
蒙陰亭亭一名也或以為在牟陰或以為在鉅平
社首一地也或以為在鉅平或以為在博縣則服
虔晉灼應劭之論不同既曰伏羲神農禪云云又
曰三皇禪繹繹既曰帝嚳堯舜禪云云又曰五帝
禪亭亭既曰禹禪會稽湯禪云云又曰三王禪梁
甫則管仲孔穎達之說為不一紛紛異議迄無訂
證唐虞三代果有是乎七十二君果足信乎設有

是事六經遺文豈應不載吁安得仲淹泰伯子由
與之議封禪之非哉

馬端臨曰按文中子曰封禪非古也其秦漢之後
心乎而太史公作封禪書則以為古受命帝王未
嘗不封禪且引管仲荅齊桓公之語以為古封禪
七十二家自無懷氏至三代俱有之蓋出於齊魯
陋儒之說詩書所不載非事實也當以文中子之
言為正

野翁詩話唐竇庠冬夜寓懷寄王翰林詩云滿地

霜蕪葉下枝幾回吟斷四愁詩漢家若欲論封禪
須及相如未病時按史記天子曰相如病甚可往
悉取其書使所忠往相如已死妻曰長卿未死時
為書一卷曰有使來求奏之言封禪事所忠以奏
天子異之夫封禪秦漢侈心既非古禮而相如至
死不忘缺諛夫豈忠臣而庠以自比或以比人此
唐儒之陋也韓退之亦上表勸封禪又數自謂希
相如退之儒宗猶爾如庠何議焉

明丘濬曰封禪之說詩書禮典畧不經見審有是

事乃天下國家之盛舉堯舜禹湯文武成康皆身
致太平安得闕而弗講所謂七十二君者果何代
何人哉先儒有言養生至於長生不死為國至於
祈天永命皆有是理然人未有能為之者縱為之
然亦不出乎身心日用之間非必由乎服食藥物
徼求鬼神而後致之也是故明君永年莫若寡欲
延國祚莫若愛民寡欲而至於全其天愛民而至
於過其曆誠有是理亦誠有是事嗚呼世主所以
甘心於不費之費而行封禪之禮者以有秘祝之
求也誠知此理反之於心知其必無驗之於古知
其無効則自不為矣

